

2024-mut Inatsisartut ilassutitut aningaasaliissutitut inatsisissaannut siunnersuut (Aningaasaqarnermut Akileraartarnermullu Naalakkersuisoq)

Saqqummiussissut

Siullermeerinninneq

Matumuuna Naalakkersuisut sinnerlugit 2024-mut Inatsisartut ilassutitut aningaasaliissutitut inatsisissaannut siunnersuut saqqummiutissavara. Inatsimmi atuuttumi atuarneqarsinnaavoq Aningaasaqarnermut Akileraartarnermullu Ataatsimiititaliamit akuersissutigineqartut ukiumoortumik ilassutissatut aningaasaliissutissanut inatsimmi ataatsimoortinneqassasut. Taakkulu nalinginnaasumik ukiumi aningaasanut inatsiseqarfiusumi tulluittumi Inatsisartut upernaakkut ataatsimiinneranni oqaluuserineqartarput, 2025-mili upernaakkut qinersisoqarnera pissutigalugu matumani akuersineq Inatsisartut ukiaanerani ataatsimiinneranni pissaaq.

2024-mut Inatsisartut ilassutitut aningaasaliissutitut inatsisissaannut siunnersuut taamaalilluni kingumoortumik aningaasaliinertut isigineqassaaq. Aalajangiinerit 2024-p ingerlanerani aningaasaliissutitut allannguutissat pillugit Naalakkersuisut, kiisalu Inatsisartut Aningaasaqarnermut Akileraartarnermullu Ataatsimiititaliaata aalajangiiffigisimasai, ilassutitut aningaasaliissutitut inatsimmi aaqquissuunneqarput. 2024-mut Inatsisartut ilassutitut aningaasaliissutitut inatsisissaannut siunnersuummut ilanngunneqarsimapput, ilanngussaq 1 aningaasaliissutitut 2024-mi akuersissutigineqartunik takutitsisoq aamma ilanngussaq 2 2024-mi oqaasertaliussanut allannguutitut akuersissutigineqartunik takutitsisoq.

2024-mut Aningaasanut Inatsit aamma 2024-mut Inatsisartut ilassutitut aningaasaliissutitut inatsisissaannut siunnersuut ukiumut aningaasanut inatsiseqarfiusumut 2024-mut aningaasaliissutaasunut tamarmiusunut takutitsiffiupput. Taakku aningaasaliissutaasut Nunatta Karsiata 2024-mut Naatsorsuutaanut tunngaviussapput. 2024-mut inaarutaasumik naatsorsuutit 2024-mut Nunatta Karsiata Naatsorsuutaaniissapput.

2024-mut Aningaasanut Inatsit IST-mut missingersuusiariqarsimasoq 291,4 mio. kr.-nik sinneqartooruteqarfiusasooq aamma IS-imut missingersuusiariqarsimasoq 284,4 mio. kr.-nik sinneqartooruteqarfiusasooq takutitsivoq.

2024-p ingerlanerani ilassutissatut aningaasaliissutitut akuerineqarsimasut IST-mi inernernut missingersuutaasunut ataatsimut isigalugu 416,4 mio. kr.-nik ajorseriartitsipput. Ajorseriaat pingaarnertut Nuummi erngup nukinganik innaallagissiorfimmik annertusaanermut, kiisalu Aasiaat Qasigiannguillu pilersorneqarnerannut erngup nukinganik innaallagissiorfiliornissamut 400 mio. kr.-nik NunaGreen A/S-mut aningaasaliissuteqarneranik pingaarnertut patsiseqarpoq. Taamattaaq 2024-p aallartinnerani

ilaqutariinnut meerartalinnut siunnerfeqartinneqartumik suliniummut ilaassutitut aningaasaliissut 15,2 mio. kr.-nik aningaasartalik akuerineqarpoq.

2024-mulli aningaasartuutit annerpaaffissaat, missingersuutininut inatsimmi aalajangersakkat naapertorlugit 2024-mut aalajangersarneqartartoq malinneqarpoq. Tamanna taamaallaat Suleriaaseq pillugu Ataatsimiititaliamit akuerineqartumik 430.000 kr.-nik ilassutitut aningaasaliissutaanerani, aningaasartuutit qaffasinnerpaaffiannut sunniuteqartumik patsiseqarpoq.

Tamanna tunngavigalugu ilassutitut aningaasaliissutininut Inatsisissatut Siunnersuut ukiumi aningaasanut inatsiseqarfiusumi 2024-mi IST-p inernerani 125 mio. kr.-nik amigartooruteqarnermik IS-illu inernerani 132 mio. kr.-nik amigartooruteqarnermik kinguneqarpoq.

Naalakkersuisut manna 2024-mut aningaasanut ilassutissatut siunnersuummik suliaqarlutik aningaasaqarnerup inissisimanera siumut nalilernissaanut pingaartippaat. Aningaasaqarneq massakut aalisarnermit nikerartumik isertitaqarfiuvoq, Namminersorlutik Oqartussat ingerlatseqatigiiffiinit annikinnermik iluanaaruteqarfiulluni, utoqqaallu amerlanerulerneri pissutigalugu aningaasartuuteqarnerullutik.

Piaartumik aaqqissuusseqqittoqanngippat politikikullu pingaarnersiuisoqarani Nunatta Karsia aningaasanik amigartoorfiussaaq. Naalakkersuisut taamaammat ukiut aningaasanik inatsiseqarfiusunut aningaasanik tigorianaateqarnissaq piffissarlu ungasissoq isigalugu isertitat aningaasartuutillu oqimaaqatigiinnissaat aqutigalugit sukannersumik aningaasaqarneq ingerlassavaat. Attassiinnarnissamik Ineriartortitsinissamullu Pilersaarut II-mik suliaqarneq aaqqissuusseqqinnissamullu sammiviit pilersaarutigineqartut inuiaqatigiinnut attassinnaasumik aningaasaqarnermut ilapittuissapput. Manna ataatsimiinnerni Inatsisartut aningaasanut inatsisissatut siunnersuut suliarissavaat, Naalakkersuisullu neriuutigaat, sammisat taaneqartut aningaasanut inatsimmik oqallinnermi aamma pingaaruteqarumaartut.

Taamatut oqaaseqarlunga Naalakkersuisut 2024-mut Inatsisartut ilassutitut aningaasaliissutininut inatsisissaannut siunnersuutaat Inatsisartunut suliaassanngortippara.